

Odluka Visokog predstavnika o imenovanju Izborne komisije Bosne i Hercegovine

Koristeći se ovlaštenjima koja su mi data članom V Aneksa 10 (Sporazum o civilnoj implementaciji Mirovnog ugovora) Općeg okvirnog sporazuma za mir u Bosni i Hercegovini, prema kojem je Visoki predstavnik konačni autoritet u zemlji u pogledu tumačenja spomenutog Sporazuma o civilnoj implementaciji Mirovnog ugovora; i posebno uzevši u obzir član II. 1. (d) gore navedenog Sporazuma, prema kojem Visoki predstavnik “pruža pomoć, kada to ocijeni neophodnim, u iznalaženju rješenja za sve probleme koji se pojave u vezi sa civilnom implementacijom”;

Pozivajući se na stav XI.2 Zaključaka Vijeća za implementaciju mira koje se sastalo u Bonu 9. i 10. decembra 1997. godine, u kojem je Vijeće za implementaciju mira pozdravilo namjeru Visokog predstavnika da iskoristi svoj konačni autoritet u zemlji u pogledu tumačenja Sporazuma o civilnoj implementaciji Mirovnog ugovora kako bi pomogao u iznalaženju rješenja za probleme, kako je prethodno rečeno, “donošenjem obavezujućih odluka, kada to bude smatrao neophodnim,” u vezi sa određenim pitanjima, uključujući (u skladu sa tačkom (c) ovog stava) i “mjere u svrhu osiguranja implementacije Mirovnog sporazuma na čitavoj teritoriji Bosne i Hercegovine i njenih entiteta”;

Pozivajući se na sporazum iz člana V Aneksa 3. Općeg okvirnog sporazuma za mir u Bosni i Hercegovini kojim se Bosna i Hercegovina i entiteti obavezuju da osnuju stalnu Izbornu komisiju odgovornu za provođenje budućih izbora u Bosni i Hercegovini;

Konstatirajući da je Parlamentarna skupština Bosne i Hercegovine 23. avgusta 2001. god. donijela Izborni zakon Bosne i Hercegovine, kojim se između ostalog osniva Izborna komisija Bosne i Hercegovine s ciljem da regulira zakonitost rada izbornih komisija i biračkih odbora u skladu sa tim zakonom;

Uočavajući da je navedeni zakon objavljen u "Službenom glasniku Bosne i Hercegovine", br. 23/01, 19. septembra 2001. god. sa stupanjem na snagu osam dana od dana objavljivanja;

Podsjećajući da sam Odlukom od 27. septembra 2001. god. objavljenom u "Službenom glasniku Bosne i Hercegovine", br. 27/01, 24. oktobra 2001. god. imenovao međunarodne članove Izborne komisije;

Konstatirajući da se članom 18. stav 1. tačka 5. navedenog zakona predviđa da ako članovi Izborne komisije iz Bosne i Hercegovine ne budu imenovani do 15. septembra 2001. godine, Visoki predstavnik imenuje članove iz Bosne i Hercegovine;

Imajući u vidu preporuke Privremene komisije za imenovanje;

Uzevši u obzir sve navedeno, donosim slijedeću

ODLUKU

1. Ovom odlukom u Izbornu komisiju Bosne i Hercegovine imenujem:

g. Hilmu Pašića, za člana Komisije iz reda bošnjačkog naroda,

g. Branka Perića, za člana Komisije iz reda srpskog

naroda,

gđu Lidiju Korać, za člana Komisije iz reda hrvatskog naroda,

g. Vehida Šehića, za člana Komisije predstavnika grupe ostalih.

2. Imenovanje iz prethodne tačke stupa na snagu danom donošenja ove Odluke i važi pet (5) godina ili dok ja ne odlučim drugačije.

Ova Odluka stupa na snagu odmah i odmah se objavljuje u "Službenom glasniku Bosne i Hercegovine", "Službenim novinama Federacije Bosne i Hercegovine" i "Službenom glasniku Republike Srpske".

Sarajevo, 16. novembar 2001. god.

Wolfgang Petritsch

Visoki predstavnik